

唐會要一百卷，宋王溥撰。溥字齊物，並州祁人。漢幹佑中，登進士第一。周廣順初，拜端明殿學士。恭帝嗣位，官右僕射。人宋仍故官，進司空，同平章事，監修國史，加太子太師，封祁國公，卒謚康定。事跡具宋史本傳。初，唐蘇冕嘗次高祖至德宗九朝之事，為會要四十卷。宣宗大中七年，又詔楊紹復等次德宗以來事，為續會要四十卷，以崔鉉監修。段公路北戶錄所稱會要，即冕等之書也。惟宣宗以後記載尚缺，溥因復采宣宗至唐末事續之，為新編唐會要一百卷。建隆二年正月奏御，詔藏史館。書凡分目五百十有四，於唐代沿革損益之制，極其詳核。官號內有識量、忠諫、舉賢、委任、崇獎諸條，亦頗載事跡。其細瑣典故，不能概以定目者，則別為雜錄，附於各條之後。又間載蘇冕駁議，義例該備，有裨考證。今僅傳鈔本，脫誤頗多。八卷題曰郊議，而所載乃南唐事；九卷題曰雜郊議，而所載乃唐初奏疏，皆與目錄不相應；七卷、十卷亦多錯入他文。蓋原書殘缺，而後人妄摭竄入，以盈卷帙。又一別本，所闕四卷亦同，而有補亡四卷，采摭諸書所載唐事，依原目編類，雖未必合溥之舊本，而弘綱細目，約略粗具，猶可以見其大凡。今據以錄入，仍各注“補”字於標目之下，以示區別焉。

本書採用江蘇書局本，對《唐會要》做了 1000 多條校證。

帝號上

獻祖 宣皇帝諱熙。涼武昭王厲曾孫，嗣涼王歆孫，弘農太守重耳之子也。武德元年六月二十二日，追尊為宣簡公^[1]。咸亨五年八月十五日，追尊宣皇帝，廟號獻祖，葬建初陵。在趙州昭慶縣界。儀鳳二年五月一日，追封為建昌陵。開元二十八年七月十八日，詔改為建初陵。

懿祖 光皇帝諱天賜。宣皇帝長子。武德元年六月二十二日，追尊懿王。咸亨五年八月十五日，追尊光皇帝，廟號懿祖，葬啓運陵。在趙州昭慶縣界。儀鳳二年三月一日，追封為延光陵^[2]。開元二十八年七月十八日，詔改為啓運陵。

太祖 景皇帝諱虎。光皇帝第二子。武德元年六月二十二日，追尊景皇帝，廟號太祖，葬永康陵。在京兆府三原縣界。

世祖 元皇帝諱昺。景皇帝第二子。武德元年六月二十二日，追尊元皇帝，廟號世祖，葬興寧陵。在京兆府咸陽縣界。

高祖 神堯大聖大光孝皇帝諱淵。元皇帝第四子，母曰元貞皇后獨孤氏。隋義寧二年五月二十日，受禪於太極殿。年五十三。武德九年八月八日，傳位，稱“太上皇”。貞觀九年五月六日，崩于大安宮垂拱前殿。年七十。其年十月庚寅，葬獻陵。在京兆府三原縣界。諡曰大武皇帝，廟號高祖。哀冊文，秘書監

[1] 舊唐書高祖紀作武德元年六月“己卯，備法駕，迎皇高祖宣簡公已下神主，附於太廟”。新唐書高祖紀武德元年六月“己卯，追諡皇高祖曰宣簡公；皇曾祖曰懿王；皇祖曰景皇帝，廟號太祖，祖妣梁氏曰景烈皇后；皇考曰元皇帝，廟號世祖，妣獨孤氏曰元貞皇后；妃竇氏曰穆皇后”。冊府元龜卷三十同，該月甲戌朔，己卯初六日。下文均同，不再出註。

[2] “儀鳳二年三月一日”，前文作“儀鳳二年五月一日”，此處為“三月一日”，必有一誤。兩唐書高宗紀不載。冊府元龜卷三十“儀鳳二年五月壬戌，詔：‘尊宣皇帝陵為建昌陵，先(光?)皇帝陵為延陵。’”五月壬戌朔。